

आकाशवाणी जयपुर—अजमेर

समाचार

- प्रधानमंत्री नरेन्द्र मोदी मन की बात कार्यक्रम मांय वैश्विक कपड़ा अपशिष्ट संकट अर बिरखा जल संग्रहण समेत केई मुद्दां माथे चर्चा करी।
- आखा प्रदेश मांय राजस्थान दिवस अर न्यारा न्यारा तिवांरा रो उमाव— राजधानी जयपुर मांय शानदार सांस्कृतिक सिंज्या रो आयोजन।
- राज्य मांय आज ऊं सड़क गुणवत्ता निरीक्षण जातरा री सरूआत।

अर

- प्रदेश मांय केई ठोडां उतराद हवा रा असर ऊं सांझ—संवारा मामूली ठण्ड रो एहसास।

.....

प्रधानमंत्री नरेन्द्र मोदी कयो है के वस्त्र अपशिष्ट टेक्सटाइल वेस्ट री चुनौती आखी दुनिया सारू चिंता रो कारण बण गयी है। वणा कयो के केई भारतीय स्टार्टअप्स ई चुनौती ऊं निपटण सारू सराहवण जोग कोशिश कर रिया है। प्रधानमंत्री आज आकाशवाणी ऊं प्रसारित होबण वाळा मासिक कार्यक्रम मन की बात मांय बोल रिया हा। वणा कयो के ये स्टार्टअप्स टेक्सटाइल वेस्ट ने रिसाइकिल करने केई तरह रा उपयोगी उत्पाद बनाया जावे। प्रधानमंत्री बिरखा रा पाणी ने भेळो करण री अरज करी। वणा कयो के बत्ती ऊं बत्ती लोगां ने जल संरक्षण, जल संचयन अभियान ऊं जुड़णो चाहिजे, जिण ऊं प्राकृतिक संसाधनां ने आगली पीढ़ी ताई पूगाया जा सके। प्रधानमंत्री पढेसरां ऊं गर्मी री छुट्टियां रे दौरान नुवा हुनर विकसित करण री अरज करी। वणा माय भारत कैलेण्डर री चर्चा करता न्यारी—न्यारी गतिविधियां रो हिस्सो बणण री बात कही।

.....

प्रधानमंत्री अजे ई पूरा व्हया खेलो इंडिया पैरागैम्स मांय खिलाडियां रा प्रदर्शन री सरावणा करी। वणा कयो के पैरा स्पोर्ट्स चावो व्हे रियो है। प्रधानमंत्री कहयो के अबे स्वदेशी खेल ई चावां व्हे रिया है। श्री मोदी कयो के अंतर्राष्ट्रीय योग दिवस रे नजदीक आवण री गिणती सरू व्हे गयी है। अबे 100 दिन ऊं ई कम रो बगत रह गयो है। वणा लोगां ऊं योग ने आपरा जीवन मांय भेळा करण री अरज करी।

.....

000

प्रधानमंत्री नरेन्द्र मोदी कयो है के गरीब लोगां ने चोखो ईलाज मुहैया करावणो सरकार री सब ऊं मोटी प्राथमिकता है। वणा कयो के आयुष्मान भारत योजना रे तैत करोड़ों लोग मुफ्त इलाज री सुविधा ले रिया है। श्री मोदी आज महाराष्ट्र रा नागपुर मांय माधव नेत्रालय प्रीमियम सेंटर री नीव धरतां कयो के जन औषधि केन्द्रां माथे गरीबां अर मझला तबका रा लोगां ने सस्ती दवायां मिल री है। आयुष्मान भारत रे कारण आज करोड़ों लोगां ने मुक्त इलाज री सुविधा मिल री है। हजारों जन औषधि केन्द्र देश रा गरीबां अर मध्यमवर्गीय परिवारां ने सस्ती दवाया दे रिया है। श्री मोदी कयो के राष्ट्रीय स्वयंसेवक संघ रा कार्यकर्ता देशभर मांय निःस्वार्थ भाव ऊं सेवा कर रिया है।

000

राजस्थान आज आपरो 76वों थापना दिवस मना रियो है। प्रदेशभर मांय ई मौके न्यारा न्यारा कार्यक्रम राखी ज्या है। चैत्र शुक्ल प्रतिपदा माथे राजस्थान दिवस मनावण रा ऐलाण रे पछे 25 मार्च ऊं राजस्थान दिवस साप्ताहिक महोत्सव री सरूआत व्ही। ई दौरान राज्य सरकार राजधानी जयपुर समेत न्यारा-न्यारा शहरां मांय राज्य थर रा कार्यक्रम राखी ज्या। इण री मार्फत महिलावां, काश्तकारां, नौजवानां अर वंचित तबका सारू न्यारी-न्यारी योजनावां री सौगात दीरीजी। राजधानी जयपुर मांय आज राज्य थर री सांस्कृतिक संध्या अल्बर्ट हॉल माथे राखी ज्यी है।

राष्ट्रपति द्रौपदी मुर्मु, उपराष्ट्रपति जगदीप धनखड़ अर प्रधानमंत्री नरेन्द्र मोदी राजस्थानवासियां ने थापना दिवस री शुभाकामनावां देवता प्रदेश री गौरवशाली परम्परावां, मेहमान सत्कार अर विविधता रो जिकरो कर्यो। प्रधानमंत्री राजस्थानियां री उद्यमशीलता री सराहना करी।

000

000

हिंदू नुवो साल आज ऊं सरू व्हे ग्यो है। इण ने नवसंवत्सर ई कयो जावे। ओ चैत्र शुक्ला प्रतिपदा ऊं सरू होवे है। राष्ट्रपति, उपराष्ट्रपति अर प्रधानमंत्री ई मौके सगळा देशवासियां ने शुभाकामनावां दी है। राष्ट्रपति सोशल मीडिया पोस्ट मांय कयो के ओ तिवार आपां री सांस्कृतिक विविधता ने दरसावे है अर सामाजिक एकता ने बधावो देवे है। उपराष्ट्रपति कयो के भारत मांय न्यारा न्यारा नाम ऊं ओ तिवार रीत मुजब नुवा साल री सरूआत है। प्रधानमंत्री आपरा संदेश मांय कयो के न्यारा न्यारा पर्व अर तिवारां ने देश मांय उमाव रो माहौल है।

ओ आपां री विविधता मांय एकता रो मजबूत प्रतीक है। आज ऊं ई चैत्री नवरात्रि ई सरू व्हीया अर भगवान झूलेलाल री जंयती चेटीचंड पर्व मनायो जावे। इण ने ले र प्रदेश मांय श्रद्धा, उमाव अर भक्ति रो संगम देखण ने मिल रियो है। मिन्दरां अर न्यारी न्यारी ठोडां धार्मिक आयोजन व्हे रिया है। सवाईमाधोपुर रा चौथ का बरवाडा मांय चौथ माता मिन्दर मांय श्रद्धालुआं रो सैलाब उमडयो है।

अलवर रा बाला किला करणी माता मिन्दर मांय आज ऊं मेळो भरी ज्ये। वठे ई पाली रा नाडोल मांय आशापुरा माता मिन्दर मांय भक्तां री भीड़ निजर आय री है। उठी ने बालोतरा रा नागडेचा अर भटियाणी मिन्दर अर जैसलमेर रा तनोट माता मिन्दर मांय ई दर्शनियां रो तांतो लाग्यो है। अजमेर मांय विधानसभा अध्यक्ष वासुदेव देवनानी लोगां ने तिलक लगार नुवा संवत्सर अर चेटीचंड री शुभाकामनावां दी। हनुमानगढ मांय झूलेलाल मिन्दर मांय श्रद्धालुआं री कतार देखी जावे। ई मौके लंगर ई लगायी ज्यो।

000

राज्यपाल हरिभाऊ बागडे ईद-उल-फितर रे मौके प्रदेशवासियां ने बधाई अर शुभाकामनावां दी है। चांद दिखण माथे ईद रो तिवार काले मनायो जाएला। ईदगाह अर न्यारी मस्जिदां मांय ईद री भेळी नमाज अदा करी जाएला। लोकपर्व गणगौर काले मनायो जाएला। होळी ऊं सरू व्हीयो ईसर गणगौर रा पूजन रो सिलसिलो पूरण व्हेला। पूजा रे पछे ताळाब, सरोवरां अर बावडियां माथे मंगळ गीतां रे साथे गणगौर मूरतां रो विसर्जन करयो जाएला। इण ऊं पैलां आज सिंजारो मनायो जावे। ई मौके ब्याहता ने मेंहदी, सिणगार रो सामान, कपड़ा-लत्ता, मिठाई अर दूजा निजराणा दिया जावे। सुख अर सौभाग्य ऊं जुड्या ई लोकपर्व माथे राजधानी जयपुर मांय दो दिन ताई शाही लवाजमा रे साथे गणगौर री सवारी निकाली जाएला।

000

राज्यपाल हरिभाऊ बागडे कयो के राजस्थान भक्ति, शक्ति अर वास्तुशिल्प कला रो अद्भुत प्रदेश है। श्री बागडे आज पाली जिला रा रणकपुर पूग्या। वणा तीर्थकर आदिनाथ मिन्दर मांय पूजा-अर्चना करने सगळा रा मंगल री कामना करी। राज्यपाल रणकपुर रा शानदान जैन मन्दिरां री नक्काशी अर शिल्प सुन्दरता री सरावणा करता इण ने कला रो अनूठो नमूनो बताया।

000

प्रदेश मांय आज ऊं सड़क गुणवत्ता निरीक्षण जातरा री सरूआत व्ही। श्रीगंगानगर मांय सरकारी पोलीटेक्निक कॉलेज ऊं यात्रा री सरूआत व्ही। पीडब्ल्यूडी महकमा कानी ऊं सड़कां रा वाजिब रख-रखाव मांय जनभागीदारी बधावण सारू आ पहल करीजी है। आ जातरा आज चैत्र सुदी प्रतिपदा ऊं सरू व्हे र न्यारा न्यारा जिलां मांय होवता मई म्हीना मांय बुध पूर्णिमा ने पूरी व्हेला। सड़क गुणवत्ता निरीक्षण जातरा ने सगुनी रा नाम ऊं जाणी जावे। जातरा रे दौरान सड़क हिफाजत रे प्रति जाग जगायी जाएला।

000

प्रदेश मांय केई ठोडां उत्तराद हवावां रा असर ऊं सांझ-संवारा मामूली ठण्ड रो एहसास बण्योडो है। केई शहरां मांय रात रो तापमान 10 डिग्री सेल्सियस ऊं नीचे मापी ज्यो। वठे ई दिन रा तापमान मांय ई कमी दर्ज व्ही है। माउंट आबू मांय कमती रो तापमान 7 डिग्री सेल्सियस अर सीकर रा फतेहपुर मांय 7 दशमलव 2 डिग्री सेल्सियस रिकॉर्ड व्ह्यो। पाली, करौली, बारां, चूरू, भीलवाडा अर टोंक मांय ई रात रो तापमान 15 डिग्री सेल्सियस ऊं नीचे रियो। जयपुर, दौसा, अजमेर, जोधपुर अर नागौर समेत केई जिलां मांय दिनभर ठंडी हवा चाली। मौसम महकमा मुजब प्रदेश मांय एक अप्रैल ताई उत्तराद हवा रो असर रहवेला अर तापमान सामान्य ऊं कम रहवेला। वठी ई दो अप्रैल ऊं आथूणी विक्षोभ रा असर ऊं कुछ ठोडां मौसम मांय बदलाव रा आसार है। उदयपुर अर कोटा संभाग मांय कठे ई कठे गरज रे साथे हळकी बिरखा व्हे सके है। महकमो आठ जिला सारू बिरखा रो येलो अलर्ट काढ्यो है।

000

सिरोही जिला रा माउंट आबू रा जंगळां मांय काले दोपहरां आग लाग ग्यी। धीरे-धीरे आग कोई दो किलोमीटर हलका मांय फैल ग्यी। आग रे जंगळी जीवां रा प्राकृतिक रेहवास ने नुकसाण पूग्यो है। जंगळात महकमा रा रेंजर गजेन्द्र सिंह बतायो के महकमा रा कर्मचारी अर मजूर अर दमकल री मदद ऊं आग बुझावण री कोशिश अजे ई करी जावे। इण माथे घणखरी हद ताई काबू कर लीरी ज्यो है। घटना री जाणकारी मिलता ई जंगळात महकमो अर प्रशासन सावचेत व्हे ग्यो। वणा बतायो के आग लागण रा कारणों रो पतो नी लाग्यो है।

000

ब्यावर हाईवे माथे आज एक सड़क हादसा मांय तीन लोगां री मौत व्हे ग्यी। हादसो जवाजा चौराहा रा सरवीना कने व्हीयो। इण मांय कार सवार दम्पत्ति अर वां रा बेटा री मौत व्हे ग्यी। सामी जिनावर आ जावण ऊं कार बेकाबू व्हे र पलट ग्यी। ई दौरान तेज धमाको ई व्हीयो। हादसा मांय सात दूजा लोग घायल व्हे ग्या। वां ने अजमेर रा जेएलएन अस्पताल रैफर करी ज्या है।

000